


## LI PTITE WACHLÈTE (2)



Lès ptitès princesses avîne chake ène cwane do corti po-z-i fouyî èt planter à leû chénance. Iène î avéve arindjî dès boyêyes di fleurs po k'ça richone à one balin.ne, ène ôte po z-è fé ène sirin.ne. L'pus ptite, lêye, avéve chwèzi di n' mète ki dès rodjès fleurs èt z-è fé on grand solia. C'n' èstéve nén one crapaude come lès ôtes, èle èstéve paujère èt fwârt tûzeuse. Sès soûs mètîne è leû bokèt d' sauvlon flori dès agayons trovés dins lès sikètés batias nèyîs pa lès timpèsses, lêye, foû d'sès rodjès fleurs po riprisinter solia d' la-wôt, èle n' avéve volu î mète k' ène bèle postûre di mârbe : on bia djonne ome sculté dins l' clére blanke pîre, ètou tchèyu au fond dins on naufrâdje. A costé, èle a mètû one botûre d'on plorant rodje ôzère k'a créchu on n'pout mia èt lèyî pinde sès frisses tènès coches autoû do valèt djusk'au bleuw sauvlon à tête. S' violète ombre èt lès fouyes î baloncîne èchone; on aréve dit ki l' copète èt lès racènes djouwîne à s' rabrèssî èt bètchî.

Li pitite Wachlète rafiyéve d' ètinde cauzer d' amon lès omes, vèla, bén wôt. L' viye

marène duvéve lî conter tot c'k'èle poléve sawè dès batias èt dès viles, dès omes èt dès bièsses. Li ptite èstéve èwaréye ki lès fleurs polichince î sinte ène sakwè, i gn' avéve pont d' odeûr au fond dèl mér, èt k'lès bwès î fuchisse d'on riglatchant vèt, èt k'lès pèchons dins leûs coches polinche tchanter si clér èt si bén k' c' èstéve on plèji d'lès choûter. Si l' grand moman loméve pèchons lès mouchons c' èstéve po s' fé bén comprinde, pace qu' il èst sûr ki sès bauchèles n' avîne mau vèyu d' sauvèrdia, d' sizèt o d' cardinâl.

- Kand vos aroz vos kinze ans, lzeu dijéve l' tayone, vos poroz nd' aler au dizeu dèl mér èt awè l' drwèt d' griper dsus lès rotches à l' lumère dèl lune èt riwêti passer lès grands batias. Vos è vièroz dès bwès èt dès viles !

Cit anêye la, iène dès soûs ariva à sès kinze ans, mins lès ôtes avîne chake doze mwès d' mwins ki l' cine k' èle chûvéve. L' pus djonne duvéve don co ratinde cink ans po polu rmonter do fond dèl basse èt riwêti comint k'c'est amon nos autes ! Chake promètéve di conter aus chûvantes c'k' èle aléve voye èt trover d'mia l' prumî djoû.. au djoû. C' èst k'èles ni s' continfîne nén dès istwères di leû marinne, èle è volîne todi sawè d' pus !

L' pus sins pacyince èstéve li pus djon.ne. Lêye k' èstéve li pus paujère èt l' pus tûzeuse duvéve djustumint ratinde li pus lontimps. Pus sovént k'a s' toû à l' nût, èle dimèréve divant s'fènièsse au laudje èt gignî, viè tot la-wôt, au truviè dèl bleuwe sombe euwe ki lès pèchons flayîne di leûs lumiantès nèviyères èt keuwes. Èle arivéve à vîre li lune èt lès stwèles. Leû luweu èstéve bén flawe mins, avou li spècheu d' l' euwe, èles avîne l' êr d' ièsse branmint pus grosses ki po nos autes. A tanawète, on aréve dit ki dès grossès nûlêyess vinîne lès muchî mins Wachlète savéve bén ki c' èstéve one balinne à trévautchî li grande basse. Sobaye ki ça s'poléve tévozé ièsse on batia, avou dès omes didins à n'awè nén l' idêye k' one bèle pitite wachlète èstéve là, pa pa-dzos d' zèles, à lzeu stinde sès mwins...

(A shûre ?)

\*\*\*\*\*

**On comache todi...**